

- 3 Stridentum lituum clangor inhorret,
Currunt precipites, urbs fluit omnis.
Stringunt pectoribus pignora matres,
'Bertino superi parcite' clamant,
Clamor sidera tranat¹⁾).
- 4 Dum spectant trepidi cuncta cremanda,
Tres caeli ueniunt arce columbae
Cignis lacte niue candidiores:
Ter circumuolitant ardua sacra,
Alis percutiunt rogos.
- 5 Caelestes uolucres aufugit ardor,
Sicut tres pueros Chaldea fornax.
Tres summa resident in cruce templi,
Donec cuncta cadens flamma periret:
Spectaculum uenerandum.
- 6 Successere dehinc festa Gregorii.
Assuetus uigiles psallere noctes
Rambertus senior peruigilabat,
In Iordane lauans ensis acumen,
Qua semper niteat, sacrat ad aram.
- 7 Hic somno grauidos clausus ocellos
Spectat plus acie mentis aperta:
En Vincentius huic palmiger astat
Martyr dalmatica splendidus alba:
Vitae flagrat odorem.
- 8 Cunctis uulneribus quae tolerarat,
Resplendent radii luminis alti,
Et de crate sua fert thimiama.
Blandus alloquitur insipientem
Gratanterque salutat.
- 9 'Salue frater, ait, et uigil ora.
Ex illa uenio luce superna.
Fratr Vincentius uisito fratres,
Et uos scire uolo quae mihi uota
Persoluistis amica.
- 10 Purgari rapidis haec loca flammis,
Iudex sidereae iusserat arcis,
'Sanctuariumque meum tollite' dixit.
Sed Bertinus ad haec Audomarusque
Orauere tremendum.

1) traanat Hs.